

# Las vuschs ston anc vegnir dumbradas ina giada

Resultats e reacziuns sin las votaziuns chantunals

DA MARTIN CABALZAR

■ **Ils resultats da la votaziun davart l'iniziativa da charvun vegnan anc ina giada controllads, quai ha confermà ier la chanzlia chantunala. Quai pretenda il stgars resultat da mo 124 vuschs differenza (damain che 0,3%). Tant l'iniziativa sco era la cuntraproposta dal cussegl grond èn vegnidas acceptadas.** Damai che mo l'iniziativa u la cuntraproposta pon dentant ir en vigur ha la dumonda da tagl stui decider. L'iniziativa ha survegnì 28 878 gea (56,4%) e 22 281 na (43,6%). Per la cuntraproposta dal cussegl grond e da la regenza «Naginas novas investiziuns en ovras electricas a charvun, sche l'emissiu da CO<sub>2</sub> na po betg vegnir reducida considerablmain» han 29 553 persunas ditg gea (60,4%) e 19 414 na (39,6%). Damai che mo l'iniziativa u la cuntraproposta pon dentant ir en vigur ha la dumonda da tagl stui decider. L'iniziativa «Gea ad electricitad netta senza forza da charvun» ha survegnì 24 650 vuschs, entant che la cuntraproposta ha survegnì 24 526, pia mo 124 vuschs differenza.

## Mario Cavigelli è surstà

Il cusseglier guvernativ respunsabel per ils fatgs d'energia *Mario Cavigelli* è surstà dal resultat fitg stretg ed avess quintà almain tar la dumonda decisiva da tagl cun in gea en favur da la cuntraproposta. I saja ina dumonda da princip sche il chantun resp. la regenza po sa maschadar en la politica da fatschenta da l'interpresa privata, era sch'il chantun è l'acziunari principal. Per il mument saja grev da predir tge effect concret che questa votaziun dal pievel haja per Repower. Tenor il text d'iniziativa stoppia il chantun «procurar en il rom da sias pussaivladads giuridicas e politicas che las interpresas cun participaziun dal chantun n'investeschian betg en ovras electricas da charvun». L'emprim stoppia ussa vegnir elavurà in artigel costituziunal che tegna



Reacziuns dals cumbattants en la votaziun: Jon Pult (ps), cusseglier guvernativ Mario Cavigelli ed Anita Mazzetta (ambient) (da san.).

FOTOS LQ

quint da questas finamiras. En quest connex renda Cavigelli attent al privel che il chantun stuess a la fin dals quints la finala vender sias aczias da Repower. Quai fissi da grond donn per l'economia grischuna da la quala Repower saja in impurtant pilaster, accentuescha Mario Cavigelli.

## Jon Pult è fitg satisfatg dal resultat

Fitg satisfatg dal resultat è il president da la Partida socialdemocratica *Jon Pult*. Il resultat saja «ina victoria per la democrazia, per la responsabladad ecologica e per la raschunaivladad economica». Grischunas e Grischuns n'hajan betg laschè influenzer e starmentar da las temas derasadas dals adversaris da l'iniziativa. Enstagl d'investar en ovras da charvun malnettas e colliadas cun gronds ristgs economics stoppian il chantun e sia Repower uss concentrar lur investiziuns en energias schubras e regenerablas. Quai porschia tant a Re-

power sco a l'economia grischuna novas perspectivas pli cumpatiblas cun il clima e cun l'ambient, è Pult persuadi. La ps spetgia da la regenza che quella formule-schia e realiseschia ussa sco represchentanta da l'acziunari principal ina strategia da manaschi che correspundia a la decisiun dal pievel.

## Parolini:

### Ina situaziun fitg speziala

Il fatg che il suveran haja acceptà la cuntraproposta cun dapli vuschs che l'iniziativa e la finala tuttina preferì l'iniziativa en la decisiun da tagl saja schon «fitg speziala». El dubetta en quest cas da la consequenza stringenta da votantas e votants. Dad ina vart saja stà enonuschent ch'i dettia en vasts circuls da la populaziun re-salvas vers ovras da charvun, da l'autra vart dettia era resalvas vers la pretensiun ch'il chantun sa maschaida en la politica d'in-

terpresas. Per el na saja betg giustifitgà che la politica defineschia mesiras retroactivas, tant pli che la situaziun sin il martgà d'energia vegnia adina pli difficila.

## Mazzetta:

### Prender serius la vieuta

Tenor *Anita Mazzetta* da las organisaziuns da l'ambient demussia il resultat che il pievel grischun veglia far serius cun la vieuta d'energia. «Nus sa legrain dal resultat che è per nus in grond levgiament», di Mazzetta. Cun la decisiun haja il pievel tschivlottà enavos il management da Repower. Il chantun e ses manaschis duain investir en energias schubras ed en il Grischun sco lieu da lavur. Il resultat porschia a la regenza la pussaivladad da curreger il stil da «laissez faire» envers Repower. Il verdict dal pievel na saja dentant betg in votum cunter Repower, mabain ina clera incumbensa da sistir immediat las lavur da planisaziun per

l'ovra da charvun a Saline Joniche e da preparar ina retirada ordinada da quest project. Il fatg che talas ovras na sajan betg pussaivlas pli en l'avegnir tar ovras cun participaziun dal chantun avria l'orizont e fullia via per la promoziun da novas tecnologias pli innovativas. Las organisaziuns da l'ambient èn sortidas – ensem cun ils socialdemocrats e verd-liberals – sco victurs da questa votaziun.

## Repower prenda enonuschienscha

Damai che l'iniziativa saja formulada mo sco impuls general tutgi uss a las instanzas politicas da formular in artigel definitiv per la constituziun. Repower vegnia a persequitar attentamain quest process. Er en l'avegnir na vegnia Repower betg a midar sia strategia da s'engaschar sin ils martgads d'energia en Svizra, Italia, Germania e Rumania e sviluppar vinavant tecnologias innovativas.